

29. grudnia 2016 r

Nō, tōż mōmy już po Godach. Szczimalichmy tyn cōłki łōński tydziyń i nasze leberka szczimali, i nasze corōżki barzij cinyke portmaneje można szczimali, i terōżki nic, ino sie wartko rychtować na Zilwestra.

I ani sie czowiek pozdōł, kej tyn roczek śleciōł, kej tyn roczek je ci już forbaj. Ździebko nōm sie we ta Wilijō i Gody pogoda pometlała, nale zwykowo bezmać gadzina we wilijnō nocka juzaś gōdała ludzkōm mōłwōm. Dlō niyftorych, festelnie dociyrnych, bōło gyszpant eźli ta gadzina we tyj nocy richtik, na isto gōdō ludzkōm sztimōm abo to ino niyftore łoszekliwe świgermutry ludzkim gōsym przegōdali?

Poszōł tyż – jak zawdy – stary Jōłzel, wywołany chorzowski gołymbiōrz do jejigo zegrōdka, coby swoji briwy nafutrować wilijnym jōdłym i nasuć łōnym łograbkōw ze kołoca i połōmane na maluśkie kōnseczki ołblaty. Jō już kejsik łozprawiōł, co tyż mu sie we jedna Wilijō przitrefiło ze jego psiokym i już niy byda tego tuplowanie eklerowōł. Sōmy przy latośnych świyntach.

Wlazuje tyn nasz Jōłzel tak opaternie na rzyps, na takō felernō drabina i łorōż suchō a sam jejigo briwy, te roztomajte szwarce, minole, prajsy gōdajōm sie i łobrobajōm, łoszeredzajōm starego Jōłzla.

– A boczycie to, kej nasz Jōłzel naprany jak bela, ścioprany nikiiej niyboske stworzyni wlazowōł na tyn rzyps i jedyn źebel mu sie złōmōł? Jak niy szupnie z wiyrchu na flapa, aże ino zarzgmiało! – gōdō jedyn siwek.

– A na drugi dziyń, kej sie go ftosik spytōł po jakiymu mō takō ojla na palicy i kalny ślyp – dogaduje jedyn szwarc – pedziōł bōł, co mu chachary we jego siyni festelnie nadrzistali.

– A boczycie kamraty – gōdō inkszy minol – kej nasz Jōłzel kciōł kokotowi uchlastnōńć łeb przed wilijōm, to sie na gnotku prasknōł we swoji palcyska.

– A gōdali sam inksze, co Jōłzel niy poradziōł kapera na wilijō ukatrupić, bo mu tak ryncyska, grace ze tyj gorzōły dyrgotali, iże sie ciyngiym po pazurach chlastōł. Chnet by sie sōm sia palcyska upajtōł – dopediała jedna cipecka ze chlywika.

Hajna borajstwo ślōz ze tego rzymisa i łostrzymnie, tak choby go gańba bōło, potrajtōł nazōd do chałpy.

Mie tyż kejsik, dōwno tymu nazōd, mōj basztard na łostuda zrobiōł i wyzdradziōł moji Elzie kaj jō na balkōnie mōm zawdy gryfnō halbecka skukanō, ale niy byda juz dzisiōj za tela wynokwiōł, prōwda?